

Date –07/10/2023

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Agriculture Minister Pu C.Lalrinsangan Ningani khan Tuirial Airfield-ah thei leh thlai sawngbawlna, vawnthat leh fun thatna hmun, 'Pack House for Fruits and Vegetables' a hawng.
2. Mizorama Chief Electoral Office hnuai Media Cell chuan Addl. CEO Pu H.Lianzela kaihhruaiin inthlanpui neih tura tana inpuahchahna meeting an nei.
3. Sikkim Chief Minister Pu Prem Singh Tamang chuan nimin khan tuilian vanga chhiatna thlenna hmunte a tlawh.
4. China- khawpui Hangzhou a Asian Games-neih mek ah India infiam mite chuan medal 95 an la tawh.



AGRI MINISTER

Agriculture Minister Pu C.Lalrinsangan Ningani khan Tuirial Airfield-ah thei leh thlai sawngbawlna, vawnthat leh fun thatna hmun, 'Pack House for Fruits and Vegetables' a hawng.

Pu C.Lalrinsanga chuan kuthnathawktute thar chhuah thei leh thlai sawngbawlna, vawnthatna leh pack-na tur hmun 'Pack House for Fruits and Vegetables', chu tangkai taka hman tum a ni, a ti a. Mipuite'n Pack House chungchang chu chiang zawkin hria se a duh takzet thu sawiin, tangkai taka an hman a duhpui thu leh anmahni tiphurtu ni ngei se a duh thu a sawi baw. Agriculture Department hnuai hmasawna hrang hrang hmuh tur awm zel chu chhuanawm a tih thu leh phurna a pek thu sawiin, Department hnuai thawktu leh a beltu Loneitute chu taimakna leh rinawmna nena theihtawp chhuah turin a fuih a ni.

RKVY atangin Quintal 60 leng Cold Storage 6, thei leh thlai thar tamna khaw hrang hrangah bun tum a nih thu leh adangte pawh a tahtawla ruahman zel tum a nih thu a sawi a. Ram neitu dik tak te'n buh leh bal hlawk zawka an thar theih nan leh crop pattern siam danglam kawngah tanlak tum a nih thu sawiin, kuthnathawktute thlai thar zawrhna tur thlenga ruahman tum a ni, a ti a. Irrigation & Water Resources Minister ni baw chuan PM KUSUM kaltlangin hmun hniam zawk atanga hmun sang zawka nizung hmanga tui pump chhuahna tur Solar Water Pump 1,700 pe chhuak tura ruahmanna kalpui mek a nih thu sawiin, hei hian thei leh thlai thar chhuah tihpun kawngah nasa takin min pui thei dawn a ni, a ti a. Tharchhuah mai bakah food processing lamah pawh tanlak deuh deuh tum a nih thu a sawi a. Pack House for Fruits and Vegetables hawn tak chu tun thal chhoah tangkai taka hman tan tum a nih thu leh enchhinna atanga tawnhriat neihte tangkai taka hman zel tum a nih thu a sawi baw.

Pack House hi Loneitute thei leh thlai thar sawngbawlna, vawnthatna leh fun thatna tura ruahman a ni a. Mizoram Sawrkar leh APEDA chuan October ni 28, 2015 khan MoU an ziak a. CDAR te ram thawh hectare 1.2 e huamchungah he hmalakna hi kalpui niin, cheng nuai 94 sing 6 sang 9 sen a ni a, APEDA in cheng nuai 800 tumin State Sawrkarin cheng nuai 144 sing 6 sang 9 a tum thung a ni.



ELECTION MEETING

Mizorama Chief Electoral Office hnuai Media Cell chuan Addl. CEO Pu H.Lianzela kaihhruiin a Office Chamber, MINECO ah meeting an nei a.

Pu H.Lianzela chuan election puan a nih veleh tul angte bawhzui thuai a ngaih dawn avangin lo inhmakhua lawk vek a tul thu a sawi a. Inthlanna felfai tak neih a nih theih nan election kaihhnawih mipuite hriat tulte media hrang hrang kaltlanga puan chhuah zung zung a pawimawh thu a sawi bawk.

He hunah hian inthlan puan a nih veleha Media Cell anga chetlak dan tur hrang hrangte sawiho a ni a. ECI in election a puan hnuah Press Conference koh nghal thuai a ngaih dawn thu leh hemi tura inpuahchah lawk tulte sawiho niin, mawhphurhna hrang hrangte siam a ni a. Vote tla a that theih nan SVEEP awareness campaign kalpui kawnga pawimawhte pawh sawiho a ni bawk.



CAREER EXPO & JOB FAIR

Ni 2 awh Champhai zirlaite leh thalaite an hmalam hun kawhmuahna leh hna hrang hrang chungchang inzirtirna hunpui – ‘Champhai Rahbi – Career Expo & Job Fair’ chu nimin khan zawhfel a ni a, Government Champhai College Multipurpose Hall-a he hun buatsaih hi nimin khan Champhai South bialtu Forest Minister Pu TJ Lalnuntluanga a hmanpui a ni.

Minister Pu TJ Lalnuntluanga chuan ‘Champhai Rahbi – Career Expo & Job Fair’ chu Champhai thalaite rahbi thar thlentu leh eizawna hrang hrang bultan tura an inpuahchahna kal mekah kawng kawhmuahna leh an rilru ti zau tu anih ngei a beisei thu a sawi a. Zirna leh eizawna kawng hrang hrangah Champhai District tan rualawhna tur a tam hle thin a, hemi kawnga Champhai District thalaite mamawh phuhruk anih theihnan Minister chuan Planning Department leh Department dangte hnenah an thlen thu a sawi a ni.

‘Champhai Rahbi – Career Expo & Job Fair’ hi Mizoram Startup Mission, Planning & Programme Implementation Department, Labour, Employment, Skill Development & Entrepreneurship Department, Mizoram Youth Commission leh Government Champhai College-te tangkawp buatsaih a ni.



CHAMPHAI ELECTION PREPARATION

Mizoram Assembly Election hmachhawn tura inpuahchahna kal zelah nimin khan Champhai DC & DEO Pu James Lalrinchhana kaihhruiin Champhai District huamchhunga inkalpawhna kawng dinmun chungchangah meeting neih a ni.

Meeting-ah hian Champhai District Election official-te leh District huamchhunga kawng chungchanga mawhphurhna chelhtute – PWD Mizoram Champhai Division, 74-RCC (GREF) Border Road Task Force (BRTF) leh National Highways & Infrastructure Development Corporation Ltd (NHIDCL), PMU-Seling hotute an tel a ni.

Champhai District huamchhunga Polling Station 84-te panna kawng dinmun zirho a ni a. Heng Polling Station 84-te zingah hian 78-te chu a panna kawng black topping/white topping niin, kawng a tha tih report a ni a. Polling Station paruk – Hruaikawn, Saikhumphai, Chawngtui E, Thekpui, Pamchung, Murlen panna kawng te chu a tha vaklo tih report a ni.

Meeting kaihruaitu Champhai DC chuan inthlan hlawhtling taka neih anih theihnan Polling official leh mipuite tan inkalpawhna kawng tha tak a awm a tul tih sawiin, District kawng chungchanga mawhphurna neitute PWD, BRTF leh NHIDCL te chu an hma zawn theuhah a tul anga hma la nghal turin a chah a. Kawngpui dung mai piah lamah polling station panna bik kawng te pawh siam tha tel turin a chah a. Kawng siam chu hun reilote a zawhfel thut anih theihloh avangin tun atanga plan mumal tak lo siam lawk a, a theih anga hma la vat turin a chah bawk a ni. Inthlan ni (Poll Day) leh a dawn ni phei chu ngai pawimawh zual tura chahin heng ni pawimawh ah te hian inkalpawhna chhiat avanga harsatna awm miahlo tura hma lo la turin a chah a ni.

<><><>

LADC CLEANLINESS

Faina Hapta Lawngtlaia hman mek ah, ningani khan Lai Autonomous District Council Secretariat chuan hnatlang runpui an nei.

LADC Secretariat Complex a Department zawng zawng, Divisional Office zawng zawng leh Lai House, Aizawl leh LADC Rest House hrang hrangte Faina hnatlang runpui hi neih niin, Department hrang hrang te chuan an Room theuhte an tifa a, Office chhung bakah Office chhehvel a hnim te an sam fai bawk. An bawlhhlawh lakkhawmte chu LADC Bawlhhlawh paihna motor hmangin an paihfai nghal vek.

Faina Hapta Lawngtlaia hman mekah hian Lawngtlai Khawpui leh Thingtlang lam ah te VC te hmalakna in Veng leh Khua ten hnatlang an nei mek a, Vengpum huapa hnatlang an nei bakah, Chhungkaw tinte mahni in leh a vel tifa vek turin VC lam chuan an ngen bawk ani.

(Lalnggheta Lawngtlai PTC)

<><><>

AKASHVANI INTVW

Akashvani Aizawl, Regional News Unit in district thar 3- Saitual, Hnathial leh Khawzawl bakah Aizawl Dist-a Part Time Corresspondent a lak tura diltute interview hun atan karleh thawhtanni Oct ni 9 khi ruat a ni a, Tuikhuahtlanga Akashvani Stationah chawhma dar 10 ah kim vek tur a ni a, document pawimawh zawng zawng endik tura ken tur a ni bawk a ni.

<><><>

SIKKIM FLOODS

Sikkim Chief Minister Pu Prem Singh Tamang chuan nimin khan tuilian vanga chhiatna thlenna hmunte a tlawh a, chhanchhuah hna chaktak a kalpui mek a nih thu a sawi.

Chief Minister chuan mitthi chhungte hnenah cheng nuai 4 pek a nih tur thu a puang, helai hmuna chhawmdawlina camp-a inkhuar mekte hnenah cheng 2000 theuh pek nghal a nih tur thu a puang bawk.

Hetihlai hian The center chuan Sikkim-a tuilian vanga chhiatna thlengte zirchiang turin Inter-Ministerial Central Team a din a ni. Union Home Ministry chuan team hian state chhunga chhiatna tawh hmunte chu rei lo teah an tlawh dawn tih sawiin, an zirchianna atanga chhut chuan Sikkim-ah Central tanpuina dang pek belh an remti dawn tih a sawi. Centre chuan tuilian tuar Sikkim-a chhiatna thlenga tanpuina cheng nuai 45 vel pek chhuah a remti bawk.

tuilian rapthlak tak ah hian mi 26 in nunna a chan a State Disaster Management Department chuan, sipai telin mi 142 chin hriat lohin an awm tih a tarlang a. In 1,100 chuang chhia in, mi 2,400 chuang chhanchhuah an ni bawk.

<><><>

ASIAN GAMES

China- khawpui Hangzhou a Asian Games-neih mek ah India infiam mite chuan medal 95 an la tawh a, heng zingah hian gold 22, silver 34, leh bronze 39 a tel. Tunah hian India chu medal tally-ah palina a ni mek a. tun hi Asian Games-a India chet that ber tum a ni.

Akashvani correspondent thudawn dan chuan nimin khan infiammi te hi an che tha hle a, Hockey, Bridge, Sepakktakraw, Archery, leh Wrestling-ah te medal an la niin a sawi. Hei nen hian gold 1, silver 2, leh bronze 6 te chu an medal tally-ah an belh leh a ni

<><><>